



06 APR, 2025

RUMAH ROSAK 20% DIBENAR DIHUNI

Metro Ahad, Malaysia



YANG di-Pertuan Agong Sultan Ibrahim berkenan berangkat melawat tapak insiden kebakaran paip gas di Putra Heights, semalam. Turut berangkat Raja Muda Selangor Tengku Amir Shah.

PUTRA HEIGHTS BERGEGAR

RUMAH ROSAK 20% DIBENAR DIHUNI

Kuala Lumpur

Hanya kediaman yang mengalami kerosakan kurang daripada 20 peratus dalam insiden kebakaran dan letupan saluran gas di Putra Heights, Subang Jaya akan dibenarkan untuk dihuni kembali bagi menjamin keselamatan penghuninya.

Ketua Pengarah Jabatan Bomba dan Penyelamat Malaysia (JBPM) Datuk Nor Hisham Mohammad berkata, berdasarkan pemeriksaan dilakukan, kebanyakan rumah diletakkan dalam kategori selamat dihuni itu hanya mengalami kerosakan kecil seperti cermin tingkap pecah selain kesan ba-

“Yang membabitkan kerosakan besar, tidak sesuai untuk masuk kecuali selepas penilaian lanjut terhadap keutuhan struktur dan pembaikan dilaksanakan”

Ketua Pengarah Jabatan Bomba dan Penyelamat Malaysia (JBPM) Datuk Nor Hisham Mohammad

hang kecil pada bumbung dan siling. Beliau berkata, kebanyakan rumah itu juga terletak lebih 150 meter dari lokasi kejadian.

“Melalui persetujuan Jawatankuasa Pengurusan Bencana Negeri, bagi kediaman dengan kerosakan kecil atau tiada kerosakan, kita benarkan penghuni mereka untuk masuk.

“Yang membabitkan kerosakan besar, tidak sesuai

untuk masuk kecuali selepas penilaian lanjut terhadap keutuhan struktur dan pembaikan dilaksanakan,” katanya ketika dihubungi Bernama.

Penilaian keselamatan itu dilakukan bersama Majlis Bandaraya Subang Jaya (MBSJ) dan Tenaga Nasional Berhad (TNB) serta kontraktor pendawaian elektrik.

Beliau berkata, pemeriksaan secara kebolehlihatan

terhadap unit rumah terjejas membabitkan permukaan struktur bangunan dinding, lantai, bumbung dan rangka bangunan selain terhadap sistem pendawaian elektrik.

Mengulas lanjut, Nor Hisham berkata, setakat ini tiada keperluan untuk mendapatkan Sijil Penyisipan dan Pematuhan (CCC) baharu untuk kategori rumah berkenaan dan sijil itu diperlukan sekiranya terdapat perubahan besar struktur rumah seperti bangunan baharu.

Sebelum ini, Menteri Besar Selangor Datuk Seri Amirudin Shari berkata, 85 rumah di Taman Harmoni disahkan selamat dan penghuni dibenarkan pulang.